

րապետաց և իրրեւ մատուցու յընթերցումն թուղթ եւսիրի Պանսիւլացւոյ, դատեցաւ գրեալ զայն Արիտական մասք եւ օտար 'ի կաթուղիէ Եկեղեցւոյ: Յետեւորդ գումարման աւարտեալ զամենայն գործս ժողովոյն՝ նզովիւք հերքեցին զչարամիտ մոլորութիւնս պատկերամարտից, և հաստատեցին յարգել զպատկերս Փրկչին մերոյ և երանուհւոյ Մօր նորին և ամենայն սրբոց, սահմանեալ կանոնս 22 'ի բարեկարգութիւն Եկեղեցւոյ: Պարտ. Տէր. Ժող. 469: Յայսմաւուր Հայոց 11 Հոկտեմբեր և 5 Դեկտեմբեր:

Յոյնք 'ի տարւոջ միանգամ յերկրորդ կիւրակէի քառասնորդական պահոց յերուսաղէմ 'ի տաճարին Ս. Յարութեան՝ մեծահանդէս թափօրիւ կատարեն զյիշատակութիւն ժողովոյն, ունելով 'ի ձեռին իւրաքանչիւր հանդիսական պատկերս փոքունս, և տան համբուրել զայնս ժողովրդոց առ հասարակ:

Յաւուրս կայսերութեան Կոստանդեայ եւ Երինեայ, նահատակեցաւ նոր արեղայն Բագոս յամիրայէ այլազգեաց՝ վասն 'ի Քրիստոս հաւատոյն յերուսաղէմ քաղաքի, զորոյ զմարմինն բարձեալ քրիստոնէից թաղեցին մերձ 'ի Սիօն. և տեղի գերեզմանի նորա կայ մնայ մինչեւ ցայսօր ժամանակի յարեւմտեան կողմն Ս. Փրկչի վանաց 'ի մէջ գերեզմանատան Հայոց, չրջապատեալ փոքր որմով, և է 'ի ձեռքս այլազգեացն Սիօնի, և ըստ բարբառոյ իւրեանց կոչեն զնա Շէյխ Էլ-Մէնսի: Արաբացիք այրեցին զՅովհաննէս Պատրիարքն 'ի տաճարին Ս. Յարութեան (969): Կայսրն Յունաց Յովհաննէս Չմէկիկ, որ և ասի Կիւրժան, դարձոյց զարչաւանս իւր յարեւելից դէպ յԱսորիս, անցեալ ընդ Դամասկոս և զԴոմօն Տիբերական՝ եմուտ 'ի Նազարէթ, եւ 'ի Լեառն Թափօր, անտի էջ 'ի Կեսարիա Պաղեստինացւոց և եհաս մինչ 'ի Ռեմէ, այլ ոչ կարաց ելանել յերուսաղէմ և ազատել զՍ. Տէրիս 'ի ձեռաց այլազգեաց, որպէս պատգամաւորօք խնդրէին բնակիչք քաղաքին, այլ դարձ արար անտի՝ յետ պատերազմին Եգիպտացւոց յաթոռ իւր 'ի Կոստանդինուպօլիս՝ տիրելով Ասորեաց և Փիւնիկեցւոց, որպէս է տեսանել 'ի թղթին զոր գրեաց առ թագաւորն Հայոց Աշոտ: Մարտ. Ռեմ. 23. (972):